

全曲共 本

第 本

場 次：全 曲

劇 中 人：

當 劇 者：

枇 杷 山 上 英 雄 血

文武生 關文虎

男賓客

正印花旦 程小菊

女賓客

小生 關文舉

樵夫

二幫花旦 趙冰霞

梅香

武生 關大朋

手下

丑生 關夫人

北派

三幫花旦 關靜宜

二邊 匈奴王

二式 匈奴大將

二武 欽差

二小 大將

四幫花旦 惠蘭

第一場

(府堂景：正面壽帳，橫匾上寫「孝悌傳家」，品字枱，正面神樓，神樓上九個神主牌)

(排子頭一句作上句起幕)(惠蘭、四梅香企幕打掃介)

惠蘭：(台口介白忪)講起我地亞老爺，在山海關掌帥印，佢孝悌以傳家，所以上也將牌匾贈，單獨大少爺，佢性情奇怪甚，好勇又牛精，不受家庭嘅教訓，不靠老爺佢提攜，聲明要自己來振奮，講開亞二少爺，十分好人品，成日跟隨住老爺，做事非常咁謹慎，兩人個性大不同，攪到奶奶日日咁搵掙

(花下句)今日滿堂喜慶，乃係老爺嘅快樂生辰。二少不久便歸來恭喜老爺，但係大少去了京師，不聞不問。(白)其實老爺奶奶都好錫大少嘅，唔知點解大少總唔思家，一陣就有好多親朋友來拜壽，快啲準備定酒席，你地快啲擺好啲位啦

(慢板序)(關大朋、關夫人全上介)

大朋：（慢板下句）喜雀噪庭階，燈花齊報喜，人逢喜事，份外精神。。

夫人：（接唱）兒女滿堂前，可算丁財兼貴壽，可奈文虎佢遠遊，未見歸來宴飲。

（白）亞虎真係搵壞我囉，老豆生日都唔返來，仲連字都無個寫返來添

大朋：（口古上句）夫人使乜搵咩，文虎素來都係大情大性，總唔念到父母痛錫佢，

教訓佢一兩句，梗係頂番你三四句嘅，真係返唔返來都唔使恨。

夫人：（口古下句）老爺，我地一世人得兩粒仔一粒女，今日你擺大壽咁高興，人

地遠親近戚，個個都來恭賀，反為自己做仔嘅，唔返來招呼人，你話成乜體

統呀，真係太過失禮人。。

大朋：（花下句）佢返來循規蹈矩無所謂，若果頂喉頂頸，仲盞得失禮親朋。。求

祈有文舉佢在家招呼，又使乜擔心搵掙。

（白）入去坐下先罷啦（仝入埋位介）

（小鑼相思）（程小菊、趙冰霞、關靜宜仝上介）（合尺相思）

小菊：（賣相思）柳眼蛾眉襯粉面，更添豐韻

冰霞：（接唱）柳腰纖細，體態撩人

靜宜：（接唱）似杏臉，襯桃唇，麗質天生

小菊：（接唱）有霧鬢，與雲鬟，貌驚天神

（三人仝入介）

小菊：（白）世伯、伯母

冰霞：（白）姨丈、姨媽

靜宜：（白）亞爹、亞媽

大朋：（口古上句）你地幾個今日都打扮得份外嬌妍，一定搽多幾趟胭脂水粉。

夫人：（口古下句）你地幾個咪成日顧住扮靚，至緊要記住招呼班戚友親朋。

三人：（仝白）得囉

小菊：（口古上句）世伯，趁現在班親友未來，不若我地一齊仝你祝壽先，恭喜你

壽比南山，官升一品。

冰霞：（口古下句）姨丈，恭喜你福如東海，龍馬精神。

靜宜：（口古上句）我恭喜亞爹年年有今日，歲歲有今朝，逗利是一人一份。（伸

手介）

（排子）（三人全叩頭拜壽介）（排子收掘）

大朋：（口古下句）乖乖，我希望你地快高長大，越來越靚，將來嫁得個如意郎君。

（帥牌）

小菊：（口古上句）何以文虎哥尚未歸來，向世伯伯母把金安叩問。

冰霞：（口古下句）何以文舉表兄都未見面，佢素來好孝順，唔通因為公務羈身。

靜宜：（口古上句）小菊姐成日掛住大哥，冰霞表姐成日掛住二哥，好似一日不見，

如隔三秋，真係多情得很。

（小菊、冰霞全羞介）

惠蘭：（口古下句）相信二少一陣就返，不過大少爺素來都唔思家，未必今日返家

行。

小菊：（這個介長花下句）文虎太不羈，太放任，秋水望窮無音問，欄杆倚遍十二

時辰，縱有情絃空響震，未得郎心繫妾心。。苦相思，斷柔腸，悲懷莫禁。

冰霞：（長花下句）休悲懷，休怨恨，大表哥佢無限前途如繡錦，他日榮歸故里冠

人群，定會人月雙圓無缺憾，何需多慮太傷心。。但係文舉不應懶步遲歸，至今雙親倚閭候等。

夫人：（白杭）文舉佢遲歸，一定係為禮品，文虎不歸來，太過唔守份，父母在，不遠遊，古人亦有訓

大朋：（白杭）知子莫若父，文虎太性耿，歸來不歸來，何必太著緊

靜宜：（白杭）我希望，大哥二哥都返來，一家全暢飲。

惠蘭：（白杭）夫人何必太緊張，不應勞神抖番陣（双）

大朋：（白）返唔返都罷，咁緊張做乜

（花下句）人來快把酒筵準備，等候賓客來臨。。

（惠蘭捧酒上，擺酒介）

（撞點）（文舉捧大堆禮物上介）

文舉：（長二流上句）談百行，孝先行，養育劬勞常記謹，辦齊禮物，祝賀嚴父生

辰（合）孝於親，從古訓，孝悌傳家名遠近，娛親戲綵效古人，忙把金安叩問。（上）（入介白）恭喜亞爹（放下禮物介）

大朋：（口古上句）文舉，你買咁多禮物做乜嘢，而家單單親友送來嘅禮物，已經多到無地方「等」。

夫人：（口古下句）唉，真係過猶不及囉，文虎絕不知親情可貴，文舉佢就雙料孝心。

文舉：（口古上句）亞媽，亞哥不過因公忘私，佢唔得閒返來，好應該由細佬代表，恭喜埋亞爹，而且我買啲禮物，都已預埋大哥個份。

小菊：（口古下句）文舉哥，你真不愧孝悌傳家，所謂兄弟如手足，本是同根生。

冰霞：（口古上句）小菊姐，二表哥仝大表哥，就差得遠叻，二表哥佢份人，真係富於情感。

靜宜：（口古下句）二哥，表姐讚你喇，乜亞表姐時常對你栽花有意，何以你好似

插柳無心。

文舉：（白）多咀

內場：（白）賓客到

（大朋與各人出迎介）

（小開門）（四男賓、四女賓捧禮物全上介）

（眾全迎入介）

男賓甲：（口古上句）我地恭喜關元帥，福壽雙全，官居一品。

女賓甲：（口古下句）我地更恭喜關元戎，丁財兩旺，快樂誕辰。

大朋：（口古上句）多謝，請各位不醉無歸，開懷痛飲。

夫人：（口古下句）請各位一齊埋席，勿嫌酒微菜薄，待慢嘉賓。

（眾全埋位介）

（帥牌）（全飲宴介）

（七才頭）（手下、二大將先上，關文虎上介）

文虎：（快點下句）胡蠻盡掃逞奇能。無敵將軍聲威震。榮歸衣錦可驕人。

（花上句）蛟龍得志會風雲，羨煞不少花街紅粉。

（揚手命手下、二大將卸下，沙塵入介）

（重一才）（眾全驚喜介）

小菊：（先鋒鉞上前執文虎介口古上句）文虎哥，估唔到你及時歸來，把壽筵暢飲。

夫人：（口古下句）乖仔，你知唔知亞媽掛你，真係關家有幸，你居然榮歸衣錦，

今日飲完壽酒，明日割雞還神。

文虎：（口古上句）亞媽，我呢個將軍唔同第二個將軍，乃係經過不少北討南征，

唔係靠人事做後台，唔係靠老豆護蔭。

大朋：（口古下句）文虎，你要記住滿招損，謙受益呢兩句說話，你切不可，以為

一朝得志，就響處白霍沙塵。

（重一才）（文虎不悅介）

（眾人食住詫異介）

冰霞：（口古上句）姨丈，大表哥載譽歸來，正係耀祖光宗，你何必一見面，又要將佢教訓。

靜宜：（口古下句）亞爹，大哥今日咁威風凜凜，你無謂令佢太過難堪。

文舉：（口古上句）大哥，今日真係高興，連你都能夠趕到返來，正係一家團圓，快啲埋位，一同舉杯痛飲。

惠蘭：（口古下句）大少爺，快啲埋位啦，待奴婢把酒斟。

文虎：（火介白）我唔飲（反線芙蓉中板下句）不應在華堂之上，侮辱大將軍。所謂青出於藍勝於藍，我使乜亞爹你教訓。唔通要細佬咁懦弱，好似一隻小鳥依人。（花上句）我唔明白，亞爹一見咗我就吟吟沉沉，真係佛爺都火滾。（白）估唔到做咗將軍返來，都仲要貼鬧，難怪我唔想返來呢個咁嘅家庭，絕無半點溫暖

（重一才）

大朋：（木魚）仔你千祈咪誤會，實在亞爹痛愛你萬分，亞爹時常教訓你，無非教

你處世做人，豈可自負英雄，就可以行為放任

夫人：

（木魚）須知招尤口舌，好易惹出禍根，今日你得作將軍，更應行藏謹慎，對人對事，更莫恃勢橫行

文虎：

（重一才不悅介快點下句）分明對我太偏心。。自小家庭無好感。一言不合拂袖而行。。（花上句）所以我寧願自力更生，不願長在此家庭黑暗。

（欲下介）

小菊：

（攔介長二王下句）你莫怒火迷心，需要行為謹慎，不應一朝得志，就氣焰迫人，金石良言為教訓，佢並非橫加侮辱，乃屬愛子，情深。。不應拂袖而行，快些華堂，共飲。

文虎：

（白）小菊，我聽你話，唔係就即刻扯㗎喇

文舉：

（花下句）大哥你不應誤會，亞爹佢實在苦口婆心。。何必要拂袖而行，如斯怒憤。

冰霞：

（花下句）大表哥今日天倫樂敘，好應淺酌低斟。。何必怒憤如斯，大家再

來痛飲。

靜宜：（花下句）亞哥不應該如斯氣盛，恐怕觸怒雙親。須知百行孝為先，你應

明古訓。

夫人：（花下句）文虎你應知在家從父，為子者豈可忤逆嚴親。快些改過歡容，

聽吓亞媽教訓。

文虎：（花下句）若非小菊妹苦為相勸，我決拂袖而行。長處此冷酷家庭，絕無

半分護蔭。

文舉：（白）好，我地再來飲杯

（帥牌）（眾仝再飲介）

（沖頭）（大將上介）

大將：（白杭）忙告稟（双）有件事情好要緊，匈奴攻打山海關，越來越迫近，請

元戎快出兵，準備與他來對陣（双）（下介）

（的的撐）（眾仝震驚介）

大朋：（仄才介花下句）匈奴聲勢利害，使我無限驚心。。因為我方將寡兵微，不

易與他對陣。（憂心介）

文虎：（三搭箭笑介白杭）亞爹使乜驚，使乜震（介）萬大有孩兒為坐鎮，我一人

可以敵萬兵，將寡兵微何足震，我要把匈奴，盡搓成齧粉

夫人：（白杭）仔呀你咪口輕輕，凡事要審慎，匈奴勢力不易擋，你無可能來對陣

小菊：（白杭）你莫亂請纓，此事並非你嘅責任，輕舉與妄為，惹起無窮恨

冰霞：（白杭）因為兵力兩懸殊，螳臂擋車太過笨

靜宜：（白杭）不若慢計以從詳，凡事要講穩陣

文舉：（白杭）切勿輕敵太交關，不若我上朝向主上來告稟，請得救兵壯軍容，然

後秣馬厲槍來對陣

文虎：（大花下句）遠水焉能救近火，細佬你太過懦弱無能。。我有本領（一才）

有雄兵（一才）我誓把匈奴手刃。

大朋：（二王下句）因為寡不敵眾，不可妄自犧牲。。

夫人：（序）你要想到真

小菊：（二王上句）又怕勝者無功，打敗者嚴刑處份。

靜宜：（序）何必要咁笨

冰霞：（二王下句）在家千日好，何苦要踏上征塵。

惠蘭：（序）大少要三思至好行

文舉：（二王上句）總之兵凶戰危，並非靠一時僥倖。

文虎：（快點下句）我能征慣戰，叱吒風雲。誓領雄兵臨戰陣。匈奴滅盡始歸臨。

（花上句）菊妹你且候佳音，他日歌奏凱旋，與你同諧婚嬪。（白）你地聽住，如果我不能盡滅匈奴，我呢世都唔會踏入關家門口（沖下介）

（眾下嘆阻攔不及介）

大朋：（花下句）文虎雖然英勇，又怕佢難敵萬馬千軍。無異虎口送羊，如何計運。

文舉：（花下句）我願赴京請救，以挽救手足之親。惟有星夜飛騎，忘餐廢寢。

(沖下介)

大朋：
(花下句) 待文舉救兵來到，一同去殲滅胡人。
。

(第一場完)

第二場

(戰場山林景：衣邊山仔樹林，寫「猛虎林」，什邊山仔)

(披星頭起幕)

(鑼邊花)(眾北派引出匈奴王，匈奴大將軍全上介)

匈奴王：(大花上句)入寇中原，如入無人之境。關家父子英雄無敵，我早探悉風情。

孤要引虎入山林，燒到佢難存性命。

(眾衣邊全下介)

(鑼邊花)(四手下引文虎上介)

文虎：(大花下句)四海之內，誰不識文虎威名。我振臂一呼，戰無不勝。且看

我雄威一起，把敵寇誅平。叫三軍，直搗長驅，誓把烽煙掃靖。(完台介)

(急急鋒)(眾北派、匈奴大將軍、匈奴王全上，與文虎搭住介)

匈奴王：(口古上句)呸，你好好下馬歸降，否則看看孤家本領。

文虎：(口古下句)呸，你快些束手就擒，就算你天不怕，地不怕，都要怕我關家

父子嘅本領威名。。。

(眾全大戰，匈奴敗下，文虎追下介)

(急急鋒)(眾北派上，文虎追上大戰介)

(食住內場放火箭，火燒山林介)

(北派跳火圈入場介)

(文虎撲埋衣什兩邊，兩邊皆火粉介)

文虎：(水波浪介花下句)莫不是今日猛虎林內，我便要命喪陰冥。。火焰沖天，快些離開險境。

(文虎撲埋衣邊，火粉介)

文虎：(搶背出台口介花下句)經已火光四起，真令我觸目心驚。。再過樹林，希望有一條路徑。

(文虎撲埋什邊，火粉介)

文虎：(搶背出台口介花下句)前無生路，今日已孤掌難鳴。。待我卸盔甲(一才)

沖出重圍（一才）生死皆由天註定。（卸下盔甲，驚火圈下介）

（火光慢慢熄滅介）

（急急鋒）（大朋、文舉全追北派、匈奴大將、匈奴王上大戰介）

（文舉殺死北派、匈奴王介）

（匈奴大將敗下，大朋、文舉欲追，見地下盔甲戰袍，執起全哭相思介）

大朋：（花下句）可憐文虎犧牲殉國，真令我熱淚盈盈。。佢死於好勝貪功，辜負

咗佢嘅英雄本領。

文舉：（花下句）我亦淒涼無限，捨不得骨肉親情。。只有將遺物取回，我相信亞

媽同小菊，一定淒涼莫罄。

大朋：（木魚）你亞媽知道，一定淒涼絕頂，亞小菊一定泣不成聲，我不忍你亞媽

心懷愛子，更不忍小菊佢孤苦仵伶，當日小菊老父在生，交小菊與我，將佢善為撫領，佢臨死仲叫我將佢娶為媳婦，免小菊佢身世孤清，不若你安慰慈懷，更免小菊佢形單隻影，你共小菊結為夫婦（二王下句）返去共繫，赤繩。。

文舉：（序）須知小菊共亞哥有愛情

大朋：（二王上句）佢經已一命身亡，你不妨姻緣，同訂。

文舉：（序）又怕小菊佢唔答應（二王下句）話我橫刀奪愛，豈不是水洗，都唔清。

大朋：（序）你唔使咁心驚（二王上句）為小菊佢幸福終身，你應該要可憐，薄命。

文舉：（序）點都覺得唔高興（二王下句）小菊佢痴心於愛，係一個情重，娉婷。

大朋：（序）我用善法令到佢應承（二王上句）有我地父母在堂，並非行為，不正。

文舉：（花下句）為慈親，為弱女，我無奈勉強應承。你勸小菊切勿太強橫，須

知我並非是貪圖，佢嘅如花倩影。

大朋：（花下句）我愛小菊如骨肉，至有叫你地鸞鳳和鳴。奏凱回歸，可憐失去

孩兒性命。

（二人全下介）

（沖頭）（文虎上介）

文虎：（大花下句）全軍覆沒，有何面目返家庭。惟有四海飄流，埋名隱姓。

(沖頭) (匈奴大將軍上介)

匈奴大將軍：(台口花下句) 待我暗中集合匈奴壯士，誓要把血債償清。。(下介)

(第二場完)

第三場

(花園景，幕序一年後：底景園林，品字枱，什邊竹籬)

(子規啼一句起幕)

(冰霞坐幕，兩頭行，無限憤恨將花擲於地，亂踏介)

冰霞：(台口介詩白)妒雨酸風愁一載，絲絲情淚灑青苔(小紅燈)我晚晚為愁蓋，時時帶恨來，心悲哀，自憐淚滿腮，何堪見人太心開，我隻影隻影在樓台，已杳心中愛，帶悲帶恨情深嗟奪愛(反線中板上句)一點小芳心，三載女兒情，誰識此痴心人在。鳳閣未催粧，月圓經別向，人已並蒂花開。日日對梅花，點點淚偷垂，我何以沉淪恨海。千古來，痴心遺恨，惟有暗自悲哀。

(花上句)心已妒，恨不能奪回所愛。(哭相思介)

文舉：(食住卸上介口古上句)亞霞，何以你呢一年來，成日暗自淒涼，你實在有何感慨。

(冰霞背身不睬，大聲喊介)

文舉：（口古下句）亞霞，何以一問你，就更加大聲喊，二表哥素來好錫你，你有

乜嘢唔滿意嘅事幹，我大可以替你解難消災。

冰霞：（白）你仲話錫我，你錫我，就唔會令我咁淒涼（長二王下句）我往日笑口

常開，我往日逍遙自在，今日我淒涼愁苦，為誰來，妒念心懷，難忍耐，到此已羞慚不避，因為你無意，把花栽。你竟花放合歡，不念我三年痴愛。

（白）二表哥，你問心啦

文舉：（難過介長花下句）一語訴芳心，三年惟痴愛，如此痴情多感慨，自慚愚鈍

更痴呆，辜負玉人為等待，我並非人如木石，但係未知你對我情重拋不開。

我已娶妻，更有孩兒，表妹你勿將舉郎相愛。（白）天下間咁多男人，你揀

過第二個嫁啦表妹，今日係蘇蝦仔滿月，你唔好喊，一陣有好多親朋戚友來

到，睇見你眼腫腫，仲唔知你做乜嘢添

冰霞：（白）哦，你個仔滿月就大晒，連喊都唔俾我喊，我仲要大聲喊添

（花下句）係囉，你就夫妻恩愛，今日薑酌筵開。可憐我失意情場，搏不

得他人些微憐愛。(白)你就可以夫妻齊存，我就喊吓都唔得，我係要喊：

(一路喊下介)

文舉：

(花下句)痴情每易招煩惱，合歡花放怎重開。。有妻有子喜團圓，獨念征

人埋塞外。(士)(坐下嘆息介)

(老鼠尾序)(文虎鬼鬼竄竄上介)

文虎：

(長二王下句)戰敗實可哀，離家將一載，有何面目再歸來，劫富濟貧，揚

四海，猶念多情紅粉，當為我淚滿，香腮。。忍不住萬點痴心，偷見此淒涼

粉黛。(白)我响猛虎林脫險之後，仲有乜面目見人，所以同埋一班手足，

在於四海之內，劫富濟貧，但係總唔捨得小菊，今日靜靜返來，希望見一見

小菊面，我以為永遠都唔會再返來嘅叻，好，等我响後花園裝吓，睇過有無

人先(騎上牆頭偷看，不慎跌落花園，起身欲走介)

文舉：

(一見大喜，急拖住介口古上句)亞哥，我以為你燒死在猛虎林，原來你仲

未死，真係令我喜出望外。

文虎：（口古下句）我當日出戰之時，誇下大口，點知中了匈奴詭計，我自問實無面目，帶恨歸來。。

文舉：（口古上句）亞哥，你癲嘅，勝敗乃兵家常事，點會無面目返來，你都唔知道，我地以為你死咗，全家都慘痛非常，無一個唔係親情深如海。

文虎：（口古下句）親情深如海，二十年來，亞爹亞媽對我，唔係打就係鬧，我覺得親情如紙薄，如果我唔係想返來，見一見我個心愛人小菊，我今生今世，永遠將家庭離開。。（白）小菊呢？細佬，小菊而家响邊處

文舉：（的的撐，花下句）一提起小菊兩字，真令我目定口呆。。我實不敢言明，恐防亞哥話我橫刀奪愛。

文虎：（白）我問你小菊响邊處，何以你眼定定咁，唔出聲

文舉：（支吾介白）小菊响：响房裡頭

文虎：（白）等我即刻入去見吓佢（欲下介）

（文舉欲攔又不敢介）

(重一才，先鋒鉞，仄才)

(食住靜宜、冰霞、夫人、大朋仝上，四梅香隨上介)

大朋：(口古上句) 亞虎，原來你未死，點解你一年咁耐至返來，我地幾乎以為你被匈奴所害。

夫人：(口古下句) 亞虎，佢地响猛虎林執到你嘅盔甲，染滿鮮血，以為你死咗，你都唔知亞媽晚晚為你，減濕咗十幾張棉胎。

冰霞：(口古上句) 大表哥，你唔死得，我地就真係開心，你應該一早就好返來，你咁遲返來，對於你，無利而有害。

靜宜：(口古下句) 大哥，你唔死得，真係要燒隻大豬還神叻，今日重逢骨肉，我都唔知幾心開。。

文舉：(口古上句) 亞哥，一切都係誤會，無謂講叻，今日敘首一堂，亞哥你唔好芥蒂於心內。

文虎：(口古下句) 我之戰敗，並非唔夠打，實在我打到匈奴走投無路，如果佢唔

係用詭計，火燒猛虎林，致令我全軍覆沒，我當可以得勝旗開。。

大朋：（花下句）你經已甩咗鬚，就無謂擺番彩，你白霍沙塵猶未改，當時我經已

勸你，唔好將亭抬，點知你自傲自驕難忍耐，果然全軍覆沒，幾乎你都要瞓棺材。。此後你就要謹慎做人，唔係你將來撞板多過食菜。

（的的撐）（文虎含怒介）

夫人：（長花下句）你唔使騶到面都紅，好似鼓氣袋，你亞爹金石良言，實在將你愛，你千祈咪忠言逆耳咁蠢材，你的確係白霍沙塵，有名叫做竇皮海，你若果能知己過，將來一定可以成勇成才。。亞媽唔係對你有偏心，如果你唔改，將來就必被沙塵所害。

文虎：（的的撐，怒介口古上句）亞爹、亞媽，我知道一返來，你地就會羞辱我，責罵我，鬼叫我輸咩，梗係你口大，我口細，我返來唔係想見你地，不過想見一見小菊，我要帶佢去海角天涯，完成我二人恩愛。（白）而家小菊响邊處

(的的撐)(眾人全大驚介)

冰霞：(口古下句)你想見小菊，想帶佢去結婚，我話你係天字第一號大蠢材。

文虎：(白)點解

大朋：(口古上句)亞虎，你唔使咁著急，小菊佢換咗衫，就出來見你，後生仔咪

咁心急至得，千祈唔好一時見唔到女仔，就周身唔自在。

夫人：(口古下句)文舉經已娶咗老婆，仔都生埋叻，今日擺滿月酒，啲人客都就

到，你要幫手招呼客人，小菊一陣就出來見你，男人大丈夫，樣樣事幹，都要大量睇開。

內場：(白)賓客到

大朋：(白)出迎(全出迎介)

(小開門)(六賓客全上介)

大朋：(口古上句)得各位賞面，一早就到來，請恕老夫疏於招待。

夫人：(口古下句)各位隨便坐，唔使客氣，息間，就會酒席筵開。

內場：（白）聖旨下

大朋：（白）出迎（仝出迎介）

（小開門）（欽差持聖旨上介）

欽差：（白）聖旨下

（各人仝跪介）

欽差：（讀旨介白）關文虎陣上身亡，關文舉剿滅匈奴有功，特將關文虎原有威勇將軍之職，改由關文舉升任，勉勵關文舉精忠報國，勿負朕望，欽此，三呼

萬歲

文舉：（接旨介白）萬歲萬萬歲

（文虎翳氣介）

大朋：（口古上句）有勞大人千里帶旨前來，啱晒叻，今天係文舉小兒滿月之期，相請不如偶遇，响處飲杯先走，今晚實行留宿在我家內。

欽差：（白）多謝（見文虎奇介口古下句）唉吔，原來文虎世侄，你未曾死嘅咩，

你都算好彩數，人人都話你因為沙塵白霍，而令到全軍覆沒，你的確係唔夠你細佬咁英雄持重，唔怪得主上將你嘅職位封咗俾你細佬做，你以後要謹慎做人至得，我係你世叔伯至教精你，而家俾你細佬叻過你，實在係好應該。

（眾賓客交頭接耳介）

文虎：（的的撐，大怒介戲姐已尾）唉呀呀，惹起心內悲哀。。（先鋒鉞，霸腔反

線芙蓉中板上句）我本是蓋世英雄，名聞四海。戰無不勝，次次得勝旗開。。

（欠兩句）（花上句）悲憤填胸，永不踏入關家門內。（先鋒鉞，欲下介）

文舉：（花下句）亞哥你本是英雄蓋世，我自問不及你文武全才。。欽差大人你勿

出此刺激之言，亞哥你勿因此而脫離出外。

大朋：（花下句）亞虎你勿因一時刺激，就把父母離開。。你此後大可以重振威風，

將來定可以揚名異塞。

夫人：（花下句）我又試抵頸唔住，要教訓你呢個咩蠢材。。一個人梗係有失敗有

成功，你俾心機做人，你慌將來唔會擺番個彩。（一才）

冰霞：（花下句）人人都有面皮血性，怪不得大表哥佢悲憤隨來。。你以後要爭氣

做人，唔係就乜嘢都俾人盡愛。

靜宜：（花下句）表姐你不應出言挑撥，你實在不該。。大哥你莫悲憤滿懷，二哥

點夠你英雄風采。

大朋：（白）亞虎，唔好多事，人來擺宴

（云云）（梅香擺宴介）

（帥牌）（各人飲宴介）

文虎：（口古上句）埋位咁耐，何以仲唔見小菊出來，而家都將近食完酒菜。

欽差：（口古下句）何以仲唔見大元帥你位新抱，抱埋你乖孫出來逗利是，快啲請

佢出來，我相信世侄婦一定好靚，靚到好似玫瑰半開。。

大朋：（白）人來，快啲請二少奶抱少爺仔出來

（梅香領命下介）

（云云）（梅香引小菊抱斗官上介）

小菊：（花下句）舊燕重回心暗苦，桃經結子倍驚駭。。弓鞋步步自徬徨，真係無可奈何無可奈。（仝入拜見介）

文虎：（一見小菊，仄才關目，先鋒鉞執小菊介口古上句）小菊，何以你咁耐至出來，又何以抱住個蘇蝦仔（介）你知唔知道，我今日慘淡歸來，都係難忘舊愛。

（小菊這個介）

文舉：（拉小菊台口介口古下句）小菊，醜婦終須都要見家翁，咁多人响處，亞哥點都唔會反面，你快啲捧茶上前，拜見大伯爺，你唔使驚到淚滿香腮。。

小菊：（花下句）舊夢前塵依稀記，往日並肩攜手在樓台。。蕭郎陌路此歸來，半愧半羞魂不在。

（梅香遞茶介）

小菊：（接茶，上前跪介白）飲茶啦，大伯爺

文虎：（一才驚介白）你叫我做乜嘢，小菊

小菊：（震介白）我：我叫你做大伯爺囉

文虎：（慢的的撐，大怒，先鋒鉞，一腳踢開茶杯盤介沉花下句）唉吔吔，嚇到我人變痴呆。。（長二王上句）當日花底吻香腮，當日盟心情似海，當日無人私語拜如來，共祝花好月圓，永遠相親相愛，豈料征人一去再歸來，你竟水性楊花，負盡我相思一載。（白）你好嫁唔嫁，嫁我細佬，仔都同佢生理，你點對得我住（三批，火介白）死妹釘，病妹釘，眼光光企响處做乜嘢，快啲担張橈開來，俾大少坐

梅香：（手震震担橈介白）坐啦，大少

文虎：（白）躡開，使乜你叫，大少會坐（重一才坐下介）

小菊：（白）文虎，你聽我解釋啦（乙反中板下句）含淚訴前因，既羞還帶恨，恨不能此際自裁。。我不是白楊花，更非有負恩情，此乃出乎意外。你一去不歸來，傳聞經殉國，我無日不飲泣在粧台。。（正線花上句）父母命，不能違，請諒我不能等待。（白）唔係我想，係世伯仝伯母搵主意

文虎：（的的撐，大怒，先鋒鉞執大朋、夫人介花下句）呢朵小菊花（一才）原是

我心間愛侶（一才）你兩個不能詐作痴呆。。何以太偏心（一才）與佢地結姻緣（一才）我問你地居心何在。（三批介白）衰老豆，衰老母，點解？

大朋：（白）嘩，衰仔作反呀你（木魚）老豆老母你都想拳頭對待，幾乎連頭殼，都俾你劈開，你老豆不是偏心，對你細佬溺愛，因為我要負責，安置呢個苦命女孩，以為你殉國身亡，小菊佢無限淒涼感慨

夫人：（木魚）我地至有叫佢地結為夫婦，免小菊佢心內悲哀，今日木已成舟，亞虎你可以移情別愛，小菊並非楊花水性，不如你搵番個良家淑女，把鴛被裁。。

（起鑼鼓）

靜宜：（王王下句）小菊姐對你情深似海，為你已淚滿，香腮。此次錯配姻緣，乃是出乎，意外。

冰霞：（長花下句）難怪大表哥你騶到火燒心，騶到難忍耐，最是淒涼惟失愛，人

地纏綿恩愛伴粧台，任你火綠火紅，人地懶瞅睬。如果小菊佢對你真心一片，就算你死咗，佢都唔肯紅杏過牆開。。開講都有話手足情深，二表哥亦不應橫刀奪愛。

文虎：

（的的撐怒介，先鋒鉞執文舉介花下句）你隻小畜牲（一才）你隻小禽獸（一才）我恨不能將你血濺塵埃。。你奪兄愛（一才）昧良心（一才）不知道親情深似海。（先鋒鉞執文舉亂打介）

文舉：

（白）亞哥，你打到夠啦，我唔係立心對你唔住嘅（反線中板下句）你一戰在邊關，全軍經失喪，以為你命化塵埃。。父母命成婚，我已經再三推辭，不敢奪兄所愛。我為憐小菊，為從父母命，至有並蒂花開。。（花上句）實不知兄未喪（一才）情海至化成恨海。（白）亞哥，你原諒我，算我對你唔住叻

文虎：

（怒介白）無得原諒（打介）

大朋：

（攔住介口古上句）嘩，衰仔，想擺命咩，唔錯都錯咗叻，我勸你打咁多，

鬧咁多就算數，而家咁多人來贈慶，唔到你一個人來擺彩。

夫人：

（口古下句）亞虎，佢地都已經結咗婚，鬧又鬧唔番，打都打唔番嘅叻，聽亞媽說話，得過且過，唔睇得開，都要勉強睇開。。

靜宜：

（口古上句）亞哥，我保證二哥唔係有心奪愛橫刀，二嫂亦唔係朝三暮四，你原諒佢地啦，唔好大翻醋海。

冰霞：

（口古下句）我講說好坦白，的確唔怪得大表哥騶嘅，官職無咗，連愛人都無理，唔騶就假囉，我做你就點都睇唔開。。

文虎：

（的的撐，大怒介白）你話點睇得開（執文舉欲打介）

小菊：

（攔介口古上句）文虎，我地點樣求你，你都唔肯原諒，無法叻，你唔好打文舉，我情願任你，將小菊如何虐待。

文舉：

（口古下句）亞哥，你打死我都無法子，你要點至消得啖氣，我情願任得你點樣制裁。。

文虎：

（慢五才，大笑介花下句）你若要我不斷腸（一才）消屈氣（一才）除非樣

樣都令我心開。。（轉快花上句）我要你讓官印（一才）仲要你讓番小菊，俾我做老婆（一才）否則我便無情對待。

（的的撐）（眾人大驚，眾賓客、欽差均喎呵介）

大朋：（怒介口古上句）衰仔，呢啲說話，你都翕得出，你個畜牲，我話一於唔得，你地唔好將佢睬。

夫人：（口古下句）亞虎，你癲咗咩，細佬嘅官職俾番你，都已經無理由，細佬個老婆都要俾番你，你話天下間，有無咁嘅道理，我點都唔准你五倫顛倒，除非我死咗，瞓落棺材。。

靜宜：（口古上句）大哥，咪話我胆大話你，咁嘅嘢都講得出嘅，你要聽吓人勸，大家前事不計，後事免提，你快啲擺番個靚老婆，兄弟間，至緊要和和藹藹。

冰霞：（口古下句）計我話就唔係叻，愛情係最偉大嘅，你睇吓幾多人，為愛情自殺，二表嫂嫁番俾大表哥，我話好應該。。

文舉：（口古上句）冰霞，你唔出聲得唔得，亞哥，將軍嘅職位，我可以辭咗，讓

番俾你，但係小菊經已嫁咗我，仔都有咗叻，點可以讓番俾你做老婆呢，我情願跪响處，任你打多幾遍，希望亞哥你另尋所愛。（跪介）

小菊：
（口古下句）大伯爺，我已經嫁咗你細佬叻，點可以嫁番俾你，天下間何多美女，你何必要苦苦迫來。。

文虎：
（的的撐，口古上句）仲話我迫你，我因為愛你，至會咁瘋狂，我因為愛你，而至肯咁蝕底，你地無謂講，如果你地唔肯應承，顧住我惡起上來，殺人如切菜。

大朋：
（先鋒鉞介口古下句）衰仔，我未曾見人惡過老豆，點都唔肯俾你咁亂籠，你想惡就殺咗老豆先，如果你唔敢殺老豆嘅，天下間就最衰你呢個蠢材。。

（打介）
文虎：
（的的撐，大怒，忍不住冷笑介白）老豆呢，我就唔敢殺，但係小菊呢，我就一定擺番（花下句）我二十年受盡家庭歧視，誰令我憤恨在心來。。我已變態（一才）我已癲狂（一才）我已誓不再回家內。（白）老實話俾你聽，

我一年來經已做咗海洋大盜（一才）但係不義之財我不取，守門劫富濟貧，我手下經已數百手足，我暫時離開呢處，俾一晚時間你地考慮，明日午時，我來擺番小菊，如果你地仲唔肯俾番我，我不獨擺人，連呢間屋都要拆爛埋，我話得到，做得到，你地因住（狂笑下介）

（各人大驚介）

欽差：（白）大帥，我地响處都無乜意思，我地要告辭叻，第時至再來探你（與眾賓客全下介）

大朋：（口古上句）俾個衰仔乜嘢架都丟清，如果佢明日真係返來，我就一刀劈死佢，好過俾佢响處有辱家門，好過佢將文舉夫妻傷害。

小菊：（口古下句）老爺，惹出瀾天大禍，我願犧牲一死，都唔願見家庭慘變，意外之災。。。（先鋒鉞欲闖死介）

（眾攔住介）

夫人：（口古上句）家嫂，你千祈唔好死，你死咗，蘇蝦就無咗老母嘅叻，老爺，

硬打硬，就唔得嘅，你聽日一早，仝亞舉出去軍營先，等我一個人應付亞虎，我係女人，佢惡極，都唔敢點惡對我，而且佢來牛精極，都聽吓我嘅說話，我自然有計仔，令到佢唔敢咁兇狼對待。

冰霞：（口古下句）咪話我多口，又試出聲吖，我大早都話，唔好俾二表哥娶小菊姐嘅叻，而家攞到咁多事幹，都係姨丈仝姨媽，太過唔應該。。

夫人：（白）冰霞，舊時你都唔係咁呀，點解近來學得把口咁曳

大朋：（花下句）睇夫人你有何回天妙計，我明日惟有暫且離開。。

（眾人仝下介）

（第三場完）

（中場休息）

第四場

（華麗府堂景：正面華麗府堂，神樓，神樓上九個神主牌，正面橫匾，上寫「孝悌傳家」）

（五更頭一句起幕）

惠蘭：（上介白杭）大少佢太囂張，太無譜，居然今日要搶嫂嫂，不念兄弟情，全不顧孝道，二少雖然係純良，但係老爺性情亦暴躁，夫人要佢地一早就離開，一定係恐防發生有變故，大少午時便到奪嬌嬈，睇吓夫人點樣將佢來教導（花上句）大少剛烈成性，令人心存恐怖。夫人雖有賢明家教，只怕佢口舌徒勞。惟有緊守門前，不敢離開半步。

（云云）（四梅香扶夫人上介）

夫人：（長花下句）哀慈母，憐慈母，一夜未眠心苦惱，可憐愛子作強徒，品性縱橫為奪嫂，可嘆佢英雄蓋世，奈何要誤入歧途。我含苦淚（一才）到門前（一才）將文虎為教導。（口古上句）惠蘭，而家係乜嘢時候，你快啲講

俾夫人知道。

惠蘭：（口古下句）夫人，而家將近午時，我相信，大少不久便返家廬。。

夫人：（的的撐，慢的的白）將近午時（花下句）亞虎佢縱然暴戾，亦當念有廿載劬勞。。且看我把妙計一施，浪子便可回頭及早。（白）惠蘭，打開大門，担張橈响正門口，等夫人坐响處

（惠蘭與梅香打開大門，担橈出門口介）

惠蘭：（白）夫人，担咗張橈出門口叻

夫人：（白）扶我出門口坐响處

惠蘭：（口古上句）夫人，呢處又熱又曬，你素來三步不出閨門，何以裡面咁涼都唔坐，偏偏坐响門口呢度。

夫人：（口古下句）惠蘭，你點知咁多嘢，你快啲担張枱出來，拿晒神樓啲神主牌來，擺在枱上，你地小心啲，因為個神樓好高。。

（惠蘭領命，與梅香在神樓取神主牌，及担枱出門口，將神主牌擺於枱上介）

惠蘭：（口古上句）擺好晒啲神主牌叻，夫人，我而家明白你嘅苦心，你一定係想設法子，感動大少個心，但係大少爺好似癲咗咁，我恐防夫人你點樣苦心法，都於事無補。

夫人：（的的撐，驚心強作鎮定介口古下句）惠蘭，唔准你多嘴，夫人一世做人做事，未曾失敗過，你睇住大少佢，要在我跟前認錯，方顯得本夫人一著棋高。

（白）你地仲唔快啲仝夫人裝煙打扇

（梅香急取水煙袋裝煙，並取扇撥介）

夫人：（一路食煙一路強作滋油介花下句）文虎佢縱瘋狂忤逆，未必一點天性全無。
看我用家法（一才）感頑兒，不讓當年孟母。

（白）惠蘭，你擺定藤條企响處

（惠蘭取藤條拿住介）

（鑼邊花）（文虎背單刀上介）

文虎：（花下句）猛虎林，我曾失敗，真是氣煞英豪。。一年後，我重回，愛侶慘

成弟婦。我已瘋狂，人變態，豈能念及手足情高。背單刀，拚之骨肉相殘，誓要珠還合浦。（完台欲入介）

夫人：（喝住，慢的的介口古上句）亞虎，你真係午時就返來，我唔准你入去住，

要同你講幾句說話先，我先問你一句，你今日返來，係唔係想學陳平盜嫂。

文虎：（的的撐，這個介口古下句）小菊係我愛人，唔係我亞嫂，文舉唔應該橫刀奪愛，點怪得我今日返來奪愛橫刀。

夫人：（白）亞虎，你咪蠻過生蕃，惡過啲老虎（禿頭中板下句）叫一句好乖兒，你切勿蠻橫無理，一味恃住好打，就氣豪。須知你在沙場，經已戰敗失蹤，以為你命歸黃土。你亞爹為諾言，可憐小菊苦命，至有叫文舉，共佢結天桃。今日大錯鑄成，你又何必重回奪嫂。亞媽唔係有偏心，的確唔係文舉，佢奪愛橫刀。（花上句）佢不過是遵從孝道。（白）唔關文舉事，係你亞爹全亞媽做主

文虎：（冷笑介白）亞媽你仲話無偏心，我信呀（長花下句）亞爹正式係老龜公，

亞媽你正式係衰老母，我前世唔修，有埋個衰細佬，我投錯胎入你門廬，我與小菊兩小無猜相友好，縱使我沙場戰死，亦不應奪去我心上櫻桃。。細佬佢先不義（一才）我然後至作不仁（一才）若不得舊夢重溫（一才）勿怪我全無孝道。

夫人：（的的撐，怒介古上句）亞虎，我真係改錯咗你個名叫亞虎，你真係仲惡過

隻老虎，講極都仲係咁牛精，有亞媽一日响處，都唔准你五倫顛倒。

文虎：（口古下句）笑話，乜嘢叫做五倫顛倒，小菊原本係我嘅，物歸原主係好應

份，如果唔俾番小菊過我，顧住我拆爛呢所關氏門廬。。

夫人：（的的撐，騾至手震介口古上句）亞虎，呢啲說話你都講得出，我俾個天你

做膽，都唔敢拆呢間屋，你睇吓我地關家門口，永遠寫住「孝悌傳家」呢四個字，邊一代唔係孝悌子孫，估唔到，我生出呢個海洋大盜。

文虎：（重一才，的的撐，怒介口古下句）孝悌傳家，如果亞爹係講孝悌，就唔會

任由弟霸兄妻，如果亞舉隻衰仔係孝悌，又點會撬大佬牆腳，連官職都霸埋

個大佬嘅，孝悌傳家呢四個字，到今日不配掛在我關氏門廬。。

（先鋒鉞，除下牌匾，踏爛介）

夫人：

（重一才，的的撐，大怒介沉花下句）唉吔吔，真係一個不肖兒曹。。（乙反木魚）你都算大逆不道，令亞媽大發牢騷，你竟敢將牌匾毀爛，不知宗祖功勞，呢個牌匾仍係御賜我關家，天下人人都知道，今日俾你個畜牲來搗亂，等如殺我千刀，枉費我二十載睡濕眠乾，當你如珠如寶，不料你恩將仇報，辜負我養育劬勞（哭相思介）

惠蘭：

（長花下句）一個人要有天良，一個人要存孝道，凡係人心都肉做，豈能不念父功母勞，大少你覺岸回頭應及早，若然強橫忤逆，他日定必日暮窮途。。大少你一世英雄，不應一時咁暴躁。

文虎：

（慢的的撐，狂笑介芙蓉中板下句）我寧不知懷胎十月，寧不知養育劬勞。。但係二十年來，受盡家庭冷酷。你對細佬就如珠如寶，你對我就如僕如奴。。（花上句）我不知有父母恩（一才）我只知要美人（一才）我要帶小菊一同

落草。(欲入介)

夫人：
(先鋒鉞，喝止介白杭)你不知有親情，不知有父母，你一定不知道有宗祖，我惟有忍氣與吞聲，將你來再教導，關家一世祖，戰死沙場歸泉土，你二世祖，七十高年尚掃墓，你三世祖，為救弟郎將賊討，你四世祖，一日遲歸便跪母，你五世祖，六十尚受兄教導，你六世祖，一生敬愛其嫂嫂，你七世祖，戲綵娛親佢時時做，講到你曾祖，一世慳儉來養大佬，講到你祖父，亦係一生孝悌人品好，就算你亞爹，對待你死鬼亞叔，亦好到離晒譜，就算你老母，嫁入關門存婦道，我真係估唔到，輪到你個衰仔就咁驕傲，若果你真係要亂倫，我問你點對得住歷代宗祖(重一才，吊慢收)(白)衰仔，你有乜面目，見呢九個神主牌

(水波浪介)

文虎：
(的的撐，花下句)亞媽，你咪以為拎死人神主牌(一才)就可以令我顏面全無。我今日不怕地(一才)不怕天(一才)我使乜怕呢九個死人宗祖。

(開邊，先鋒鉞剷枱，將神主牌盡掃落地，踏碎介)

夫人：(的的撐，氣極介白) 衰仔，你反天逆地(花下句) 你唔只有包天大膽，而且係膽大生毛。。慈母心腸，化作金剛憤怒。(白) 我打死你，惠蘭擺條藤條俾我，衰仔跪响處，等亞媽打死你

文虎：(怒介白) 你打我，我打邊個(花下句) 小小藤條鞭在手，敵不過我背上剛刀。。直闖蘭閨，把小菊強擄。(先鋒鉞欲下介)

夫人：(喝止介白) 唔准你入去，入親去打跛你隻腳

文虎：(白) 我係要入去(欲下介)

(夫人以藤條打文虎介)

(文虎搶藤條擲於地，一掌推夫人跌坐地上，沖入屋下介)

(惠蘭扶起夫人介)

夫人：(白) 快啲扶我去軍營，搵老爺仝亞舉來，至攪得掂(與惠蘭、梅香仝下介)
(力力古)(文虎拉小菊上介)

文虎：（先鋒鉞執小菊介口古上句）小菊，你同我扯，我願同你做一對海外鴛鴦，

脫離呢個封建家庭煩惱。

小菊：（口古下句）大伯爺，我已經嫁咗你細佬，我萬不能作淫娃蕩婦，你萬不能

做禮教叛徒。。

文虎：（長二王下句）我難以斷水抽刀，我要把情天再補，我要天涯海角，共私逃，

我要絕代美人歸懷抱，我要把梵籠打破，不任花種荇蕪。。你應憐我一片痴心，已變作瘋狂態度。（白）小菊，你係我嘅，你同我扯

小菊：（白）文虎，你咪野蠻（反線中板下句）春夢怕重溫，舊情如水逝，前塵影

事，化虛無。。大敗猛虎林，噩耗碎芳心，天若有情，天亦老。此身若浮萍，

隨風成弱柳，偏隨明月，入流蘇。。（花上句）我與你恩已了，愛已完，何

苦多添傷心煩惱。（白）文虎，呢啲都係天意，唔錯都已經錯咗，而家我已

經做咗你亞嫂，你唔應該再來迫我跟你走，你千祈唔好做出禽獸行為

文虎：（的的撐，白）禽獸行為（長花下句）一朵舊梅花，十年相愛好，我與你指

月盟心曾幾度，奈何一別上征途，崔護重來成陌路，真令我如狂悲憤，等若殺我千刀。。文舉佢奪吾所愛（一才）便是吾仇（一才）你是否貪新歡（一才）便忘舊好。（三批介）

（冰霞、靜宜抱斗官預早卸上，食住三批上前攔住介）

冰霞：（木魚）有新歡當然忘舊好，大表哥你使乜大發牢騷，若果佢真心真愛，就唔使共二表哥共賦天桃，怪不得人人話你牛精，叫你一肚草，任你撈到火紅火綠，好似一個火藥煲，人地經已係恩愛夫妻，可以同諧到老，我勸你無謂周身唔自諒，响處得死咁嘈

文虎：（的的撐，大怒，先鋒鉞執小菊介花下句）當年一段痴情恨（一才）今時心內未模糊。。你芙蓉帳暖渡春宵（一才）不記征人相思苦。（三批介）

靜宜：（攔介長花下句）亞哥你咪野蠻，表姐咪顛倒，經已破碎情天無可補，前情舊愛化為無，何苦今時迫嫂嫂，所謂姻緣天註定，月姥竟糊塗。。亞哥你應要顧及五倫，莫個為情翻風暴。

文虎：（火介白杭）我心又悲，心又怒（介）無人替我持公道，人是我愛人，何以

妻作嫂，我誓要此名花，重歸吾懷抱，你快隨我回山，否則我殺細佬（白）
你跟我扯（欲拉小菊介）

小菊：（白）文虎，我點都唔跟得你扯（長花下句）你品性素囂張，但為人非凶暴，
何以今時為強盜，一朝變態作強徒，與你一往情深，但係未諧鴛譜，係，我
對你已全無情愛，你莫再痴戀奴奴。。我係你弟婦（一才）你不應亂五倫（一
才）何況我已娃娃在抱。

（大笛斗官叫介）

（的的撐）（文虎怒極，兩頭跳介）

冰霞：（咸水歌）人地經已鬼咁痴纏，枉費你沖冠一怒呢，大表哥呀，我勸你不如
修心養性，無謂响處鬼殺咁嘈呀哩

文虎：（的的撐，大怒，先鋒鉞執小菊介口古上句）小菊，我問實你一聲，你係唔
係愛文舉唔愛我，你係唔係願意永遠做我弟婦，唔願同我一齊走佬。

小菊：（的的撐，口古下句）係，我今日經已愛文舉唔愛你，我願意做你弟婦，唔願與你私逃。。

（的的撐）（文虎大怒頓足介）

冰霞：（口古上句）大表哥，你聽到未呀，人地唔吼你，你就無謂响處死冤，如果我做著你，就死咗好過做人，仲有乜面目返來，企呢度。

（的的撐）（文虎怒極兩頭跳介）

靜宜：（口古下句）表姐你唔出聲，無人話你啞，你响處咁慫恻法，好容易慫出絕大波濤。。

冰霞：（白）賴我慫恻，又好笑呀，係二表嫂親口講，話唔吼你嘅，大表哥

文虎：（的的撐，快點下句）楊花水性化殘桃。。慘矣琵琶為別抱。風流夜夜竟貪圖。。（花上句）你若不隨我私逃（一才）我就要殺殺殺（一才）在堂前殺嫂。（三批介）

小菊：（快點下句）全無人性太糊塗。。死死生生非恐怖。勢難今日作私逃。。

(花上句) 你如此凶狠，簡直全無人道。(三批介)(白) 俾個天你做膽，你都唔敢殺我

文虎：(的的撐·大怒介快點下句) 錐心語語斷腸無。萬種辛酸無處訴。紅顏碧血染銀刀。(花上句) 悲憤填胸，要你命歸黃土。(拔刀沖殺介)

(小菊沖下衣邊介)

(文虎追下介)

靜宜：(口古上句) 表姐，你雖然因為情場失意，而存有妒忌之心，但係在呢個時候，唔應該仲响處靠激，而家大哥要殺二嫂叻，一日都係你把口唔好。

冰霞：(口古下句) 我以為激吓佢無乜所謂，我點知道佢真係咁惡嘅啱，我地快啲入去攔阻，唔係攞出人命，就以為我有別樣企圖。(與靜宜全追下介)

(沖頭)(小菊什邊無頭雞上介)

(食住文虎追完台沖殺，執小菊手欲殺介)

(小菊一手除鞋照文虎面打介)

(文虎急鬆開介)

(小菊乘機欲走，文虎執住小菊衣領褪前褪後介)

(小菊乘機除衫走下，文虎執衫追下介)

(沖頭)(冰霞、靜宜抱斗官上介)

冰霞：(口古上句)死叻，口多之故，我以為慫恿吓，消咗啖氣，點知攞出咁危險，

成日聽見有人叫救命，又追唔到佢地，唔知佢地响邊處，如果大表哥真係殺咗二表嫂，我聲明先，呢啲陰功，咪賴咗我做。

靜宜：(口古下句)唔賴你就假，鬼叫你咁黑心，仲唔快啲追去制止，唔係亞嫂真係會俾大哥，將佢誅屠。。(與冰霞仝追下介)

(食住文虎上，追完台介)

文虎：(執小菊快白杭)你是我妻，非我嫂，快與我逃亡，否則命難保(双)(介)

小菊：(快白杭)我非你妻，是你嫂，萬不能逃亡，五倫為顛倒(双)(介)

文虎：(快白杭)我心又悲，心又怒，你負我已忘情，我送你去黃泉路(双)

(沖殺介)

(小菊以口咬文虎之手，文虎痛極棄刀於地介)

小菊：(執刀介白)你快啲扯，如果你埋來，我就殺死你

文虎：(白)一係你殺我，唔係就我殺你(撲前搶回刀，執小菊壓在衣邊枱上，欲

殺介)

小菊：(一腳踢文虎無頭雞躓地，連隨坐在枱上喝介白)你埋親來就踢死你

文虎：(白)唔係你死，就係我死(撲前執小菊，推在枱上再欲殺介)

(冰霞、靜宜抱斗官食住上，見狀急拉住文虎介)

冰霞：(口古上句)大表哥，估唔到你真係狼得咁交關，我激錯咗你，不如大家前

事不計就算數。

靜宜：(口古下句)大哥，禽獸畜牲都有人性，何以你完全無啲親情，如果你殺死

二嫂，留下呢個無母孤兒，你話幾慘，我要你馬上丟咗呢把殺人刀。。

(大笛斗官叫介)

文虎：（的的撐，慢五才乙反長花下句）悲難訴，愁難訴，一點痴情誰可告，淒涼

夜夜暗哀號，人變瘋狂成凶暴。恨不能一刀殺盡，天下間敗柳殘桃。聞責語，聽兒啼，忽使英雄憐弱草。（白）我唔忍殺你，我要殺亞舉

小菊：（乙反長花下句）既可憎，還可怒，我本痴心難相告，強為薄倖拒私逃，佢

本屬真情非殘暴，嘆一句紅顏苦命，惹出情海波濤。我願犧牲（一才）一死謝痴郎（一才）免令再添無窮煩惱。（白）你殺我，你殺咗我，就唔會令你兄弟相殘，你殺我啦（跪下求殺介）

（文虎先鋒鉞三次殺不下手介）

（靜宜、冰霞欲攔，被文虎介入場）

（小菊水髮跪完台，求殺介）

（文虎單腳車身完台，與小菊仝水髮）

（力力古）（四梅香、惠蘭、夫人、文舉、大朋持「插仔」上入介）

（先鋒鉞）（大朋一見文虎執住沖殺介）

(靜宜捧茶盆及兩茶杯食住上介)

(冰霞抱斗官食住全上介)

(大朋用插仔重一才插在茶盆上介)

(靜宜大驚，急將插仔茶盆收埋介)

大朋：(先鋒鉞，一巴一腳踢文虎無頭雞介長二王下句)令我心內牢騷(一才)枉

我多年教導(一才)教你忠良孝悌，不能玷辱家廬(一才)豈料你戰敗偷生

為強盜(一才)更仲歸來霸嫂(一才)可算膽大生毛。。(一才)毀碎祖宗

靈牌，能不令人憤怒。(先鋒鉞再打介)

夫人：(攔介長花下句)亞虎你真太縱橫，太可惡，家聲親情全不顧，我呢個聰明

老母都無晒符，你快啲及早回頭免受苦，否則歧途誤入，將來必定性命嗚呼。

你快認錯在當堂，免至激勦你嘅慈祥老父。(白)亞虎，跪响處認錯

文舉：(長花下句)我素來有骨肉情，心中常苦惱，並非存心奪兄所好，不過難違

親命，至有賦天桃，不料兄忽歸來生憤怒，我並非不願珠還合浦，無奈不能

攪到烏喱單刀。。我寧願敝屣功名，請亞哥你勿強為奪嫂。(白)你睇亞爹
踎到咁，亞哥你斟番杯茶，向亞爹認錯啦

文虎：

(白)笑話(白杭)我無負於家庭，無負於父母，更無負於宗祖，我縱然陣
上亡，亞舉你都不應咁樣做，小菊原是我愛人，我返來要番亦好公道，我碎
毀牌匾與靈牌，完全由於心憤怒，我無罪過(一才)你地太過幫細佬(一才)
要我認錯與斟茶，除非第世投胎至會做得到(一才)(吊慢收)

大朋：

(的的撐，大怒介快點下句)畜牲忤逆膽生毛。。如此縱橫真可怒。勢難縱
你在家廬。。(花上句)怒沖天(一才)執棍兒(一才)將你兜頭亂掃。(先
鋒鉞執棍打文虎介)

文虎：

(執住棍介白)亞爹，我勸你唔好打叻，你唔夠我打嘅嗎

大朋：

(白)唉吔吔，唔通你老豆都敢打啱

文虎：

(白)迫虎跳牆，打老豆都唔係幾出奇

大朋：

(白)唉吔，衰仔，老豆都想打，打死你至得

(先鋒鉞踢文虎無頭雞，欲打介)

文虎：(白)老豆，唔好咁惡

大朋：(白)惡又點呀(再一腳踢文虎無頭雞，欲打介)

(文虎怒極起身搶棍，一掃兩掃，掃跌大朋，欲再打介)

(各人攔住扶起大朋介)

夫人：(口古上句)衰仔，真係估唔到，你連老豆都敢打，你個份人真係越做越無譜。

小菊：(口古下句)文虎，你唔應該因為我而瘋狂成咁樣，你快啲當堂懺悔，唔係你等如毀滅自己錦繡嘅前途。。

冰霞：(口古上句)大表哥，我個心原本好嬲，但係見到而家咁嘅情形，我都睇化，我反為勸你得過且過，真係多情每易招煩惱。

靜宜：(口古下句)大哥，我地原本係一個大好家庭，你唔應該因為情場失意，不念父母恩高。。

惠蘭：

（口古上句）大少，本來我係妹仔，唔敢咁大膽講嘢，但係睇見你咁嘅情形，想唔講都唔得，小菊姑娘經已做咗二少奶，你唔係娶過第二個就算數。

文舉：

（口古下句）亞哥，就算你騾，係騾我一個人，你唔應該拆牌匾，毀爛祖宗神主牌，殺小菊，打老豆，一點人性都全無。

文虎：

（的的撐，大怒介白）我無人性，你至無人性（花下句）關文虎頂天立地，並不是與禽獸同槽。你咪以為大義責人，實在你行同賊盜。

（白杭）個個話我太野蠻，太強暴，分明迫我行絕路，好，我一人對一人，免至話我唔公道，小菊本是我愛人，今已為弟婦，但係情愛未能忘，誓要明珠還合浦，今晚我與你決鬥在於枇杷山，睇吓邊個夠威武，勝者得美人，敗者歸泉土，若然你唔敢來，我明日就將小菊討，且我兩兄弟，誰個是英雄，誰個夠威武（双）（白）記住（出門下介）

文舉：

（重一才，力力古介花下句）我關文舉，豈是如同禽獸，惟有枇杷山上決高低。大哥佢咄咄逼人，無可奈何忙就道。（欲下介）

(眾人全攔阻介)

大朋：(口古上句) 嗰隻衰仔都可謂夠囂張，如果我後生的啲，一定打到佢體無完膚，可惜我而家年事已老。

夫人：(口古下句) 兩虎相鬥必有一傷，你話我點忍心，任你地相殘骨肉，同室操刀。

小菊：(口古上句) 因為我一人令到你兄弟鬩牆，我願一死，恢復你地兄弟友好。

冰霞：(口古下句) 早知你嫁大表哥，我嫁二表哥，咁唔係安樂晒，一日都係姨丈姨媽，你地發新抱寒，夾硬娶咗小菊，攪到日今日亂糟糟。

靜宜：(口古上句) 二哥，今晚你唔好去，大哥狼成咁，你點夠佢打，不如想個法子，慢慢徐圖救補。

惠蘭：(口古下句) 相嗌唔好口，相打唔好手，是但打死一個都係唔好，二少，你都係不去為高。

文舉：(花下句) 大哥佢迫人咄咄，並無別法可謀圖。我寧願血濺在山前，再不

受此無情辱侮。(沖下介)

小菊：(攔不及介白)你唔好去(追下介)

大朋：(花下句)我地都一同追去，不願見佢地有一個，命喪陰曹。。

(眾全追下介)

(第四場完)

第五場

（枇杷山景：衣什邊高山，山上佈滿石頭，可傾卸，正面遠景橋，橋下瀑布）

（五更頭一句起幕）

（首板）（鑼邊花）（樵夫担柴上介）

樵夫：（白杭）呢一處係枇杷山，非常咁鬼猛，平時無人敢到來，只有我係最大膽，

鬼叫我家窮，無法子唔將柴來斬，如今日落已黃昏，我返去茅舍食晚飯

（下介）

（二龍爭珠）（小菊背斗官上介）

小菊：（一路叫白）文虎，文舉，你地去咗邊呀（別鶴怨介）

（禪院鐘聲）愁雲泛泛，日沉落到西山，只有孤清鐵雁，飄飄泣嘆夜鳴冷落間，淒淒風送夜雨漫漫，愁漫漫，情何冷，哀未散，情懷變慘，慘矣今宵劫難，慘矣崎嶇未慣，紅花開燦爛，越惹心悲嘆，傷心不禁淚眼汎瀾

（反線中板上句）夜走枇杷山，踏碎小弓鞋，幾將羅衫輕挽。背負小嬌兒，

是冤還是孽，嘆一句薄命紅顏。。回憶一年前，鐵馬載金戈，使我樓頭望盼。
 馬革未裹屍，征人經戰死，空憐春未老，花未殘。。鳳閣嘆催粧，舊夢尚模糊，並不是寂寥傷春晚。（反線賽龍奪錦）夜冷，夜冷，夜冷，夜冷心仍未冷，鴛鴦帳，時偷自嘆，散更，散更，散更，散更驚恨散更（長句二王下句）夢斷九重關，春蠶空縛繭，我非楊花水性，愛憑欄，我好比落葉蟬飄，隨風散，我何以琵琶別抱（轉反線二王下句）竟向佢愛弟，偷彈。。失足恨難翻，姻緣多變幻，我踏遍荒山，希望把冤仇，吹散。（拉腔，完台）（二流下句）只見花眠鳥睡（士）空自淚落青衫。。（尺）一步步踏遍苔痕（合）一陣陣驚心碎膽。（上）（介）走遍枇杷山上（合尺花下句）那怕虎穴龍潭。。（一路叫文虎、文舉，衣邊下介）

（大笛大首板）

文虎、文舉：（內場全首板）枇杷山，龍虎會，心無懼憚。

（鑼邊花）（文虎、文舉各持槍，分邊上過位扎架介）

文虎：
（大花下句）今日不是我死，便是你亡還。。怒舉銀槍，經已火遮眼。

（沖殺介，十字，一沖兩沖介）

文舉：
（架住大花下句）我經已三分饒讓，哥呀你勿骨肉傷殘。。須知似海親情，

何必要相煎太慘。

文虎：
（口古上句）畜牲，你既知有似海親情。你何以霸我官，奪我愛，我問你抵

唔抵斬。（大戰，挑去文舉盔頭介）

文舉：
（口古下句）亞哥，我唔係霸你官，奪你愛，你今日迫人太甚，勿怪我都會

發野蠻。。（大戰，挑去文虎盔頭介）

文虎：
（口古上句）畜牲，你連亞哥都敢打，你都算好膽。

（大戰，挑去文舉帥旗介）

文舉：
（口古下句）亞哥，唔係我大膽，係你迫我嘅，你都不留餘地，我有乜法子，

唔變咗品性縱橫。。（大戰，挑去文虎帥旗介）

文虎：
（白）好威風

文舉：
（白）好英雄

文虎：
（梆子慢板下句）你真好威風，你真好英勇，關家兄弟，誰不力拔，泰山。

（大戰，扎架介）

文舉：
（梆子慢板上句）你真好威風，你真好英勇，關家威名，誰不羨英雄，勇猛。

（大戰，搭住孖公仔全下介）

（沖頭）（靜宜、冰霞、大朋、夫人、惠蘭全上，大叫文虎文舉介）

大朋：
（長花下句）嗰隻死畜牲，素來有包天膽，英勇過人，呢回想同我冚家劇，山中老虎都無佢咁野蠻，文舉佢忠厚純良又細膽，恐防佢一命，俾個衰仔摧殘。我一定要制止佢兩人，免至攪到人亡家散。

夫人：
（長花下句）走到我腳都跛，行到無咗個肥肚脯，心又震時，手又冷，天時暑熱，我汗斑瀾，佢地比武山前真係慘，兩個都係親生骨肉，點忍是但有一個仔，落去鬼門關。你地快啲扶住我去追蹤，因為我係肥婆，就梗係行得慢。

冰霞：

（長花下句）冤已散，情已散，註定姻緣難拆散，我多情贏得是愁煩，我本妒忌存心為離間，但係睇見佢地相殘骨肉，我亦不忍見佢地血濺荒山。鬼叫我命不如人，惟有偷偷自嘆。

靜宜：

（長花下句）天已晚，時已晚，只有眉月一彎為照眼，情關骨肉非等閒，兩虎相爭情太慘，我豈忍佢兩人同去，只得一個生還。大家快步如飛，最弊亞媽又肥又無膽。

惠蘭：

（長花下句）我扶住夫人，行到我眼坦坦，你睇吓鴉雀無聲，只有蟲聲嘆，唔知大少二少去咗邊處行，主僕之情，我都心悲慘，希望一同前去，免惹起骨肉相殘。我情願預住夫人，免至行壞你雙大腳板。

大朋：

（花下句）一日都係你個肥婆論盡，唔係我地經已行晒個枇杷山。

（眾全下介）

（披星頭）（文虎、文舉持槍水髮，孖公仔上，全大戰介）

（食住小菊背斗官上，攔住二人介）

小菊：（乙反長二王下句）我嘅紅淚斑斑，我嘅三魂經失散，我真是紅顏禍水，自

羞慚，一朵瘦菊曇花，點值得人青眼，今日名花有主，已是花事，闌珊。

我願一死在山前，望你地把冤仇，消散。（白）文虎，你殺咗我啦，你無謂

殺文舉（跪下求介）

文虎：（口古上句）我唔殺你，我係會同呢隻畜牲一決雌雄（對文舉介）如果我唔

殺咗你，唔算得係英雄，焉可以名花重照眼。（欲打介）

小菊：（攔介白）文虎，唔好打叻

文虎：（白）我係要打

文舉：（火介口古下句）亞哥，你一點親情都不念，今日唔係我傷殘骨肉，乃係你

骨肉相殘。。（二人欲打介）

（小菊食住三攔，被文虎推入場介）

文舉：（口古上句）畜牲都會有親情，我仝你都係同埋一個老母生嘅，估唔到亞哥

你，為一個女人，就連親情都盡斬。

文虎：（口古下句）到而家我也嘢都唔知道，只知就係殺咗你，奪番我個心上紅顏。

（文虎、文舉仝度打，打至拋槍，度打手橋，打至躓地，仝索氣介）

文舉：（白）仲打唔打

文虎：（白）未曾打死你，幾大都要打

（文虎、文舉仝度手橋，搭住仝入場介）

（披星頭）（文舉卸上衣邊山，連隨持樹根，跳過什邊山介）

（文虎食住卸上衣邊山介）

文舉：（白）亞哥，唔好追叻

文虎：（白）你走到天頂都追（開邊持樹根跳過什邊山介）

（開邊）（山石傾卸，文虎、文舉仝跌在山下，起身，打至碌地，一路碌入場介）

（沖頭）（大朋、夫人、冰霞、靜宜、惠蘭衣邊上介）

（小菊食住什邊上介）

大朋：（口古上句）二家嫂，你見唔見佢兩個响邊處，係唔係打得好燦爛。

小菊：（口古下句）正話响呢處打到難分難解，睇住佢地一路打咗上山。

（開邊）（文虎、文舉上，文虎將文舉打在地上，拔匕首欲殺文舉介）

（眾喝止介）

（沖頭）（大將上介）

大將：（口古上句）啟稟元帥，匈奴大將軍糾集一班殘兵，混入關前，到來要雪恨

報仇，聲明要把將軍打鱗滸膽。（下介）

（的的撐）（眾大驚介）

文虎：（急放下文舉介口古下句）打死不離親兄弟，我地要同心合力，殺晒响匈奴

餘孽，唔殺晒，我就唔姓關。。

（急急鋒）（眾北派、匈奴大將軍上，與文虎文舉大戰介）

（文舉不敵，幾被匈奴大將軍所殺介）

（文虎急上前救文舉，被匈奴大將軍一槍刺中，文虎發威，負傷殺死匈奴大將軍，

不支重傷倒地介)

(文舉殺死眾北派介)

(加四句口古)

(眾扶住文虎介)

文虎：(口古上句)我關文虎一世英雄，更有照人肝膽。而家我知道，因為我太過囂張好勝，所以亞爹亞媽，你地至管束得我咁交關。。我唔應該因為小菊而殺細佬，反家庭，樣樣事情，都明知故犯。好彩，我今日死都死得光明磊落，並無玷辱到關家英雄屢代，你地唔好因為我死，咁就傷心，我經已死得重於泰山。。(開邊死介)

(眾仝哭相思介)

大朋：(花下句)枇杷山上英雄血，仍留壯烈在人間。。

(第五場完)

(煞科)